

## **UVOD**

Kod nasljednih odnosa je veoma izražen lični momenat, pa su razlike među zakonodavstvima država brojnije nego u nekim drugim odnosima. Te razlike mogu da se pojave, kako kod zakonskog (intestatnog), tako i kod testamentalnog nasljeđivanja.

Pravila kolizionog i supstancijalnog karaktera, bilo internacionalna ili nacionalna često se nazivaju međunarodno nasljedno pravo.

Dakle, ovdje se radi o pravilima za rješavanje sukoba zakona u materiji nasljeđivanja sa međunarodnim elementom, a ne o nekom nadnacionalnom, internacionalnom korpusu opšteobavezujućih pravila za sve ili većinu država.

Razvojem međunarodnog nasljednog prava na osnovu testamenta došlo je do favorizovanja ideje kako je centralno mjesto u okviru forme testamenta zauzeo princip *in favorem testamenti*, za što je svakako najjači argument činjenica da je smisao propisa o formi testamenta u tome da osigura autentičnost ostaviočeve volje, a ne da testatoru otežava pitanje ostvarivanja njegove posljednje izjave volje.

Imajući u vidu da je smisao metoda vezivanja u tome da se dođe do mjerodavnog privatnog prava za određeni privatno-pravni odnos u situacijama kada taj odnos ima internacionalna obilježja testamentalno nasljeđivanje ukida potrebu traženja odgovarajućih težišnih kontakata. Nasljeđivanje, odnosno, pravna pitanja u tom okviru najtješnije su povezana s ostaviočevom posljednjom voljom koja je materijalizirana testamentalnim odredbama, i koja, kao takva u matrijalnom smislu ne pripada nijednom individualnom pravnom poretku.

U masi privatnopravnih odnosa koji se javljaju (nastaju ili dejstvuju) u jednoj državi, moguće je napraviti jednu generalnu diskinkciju: jedan broj tih odnosa u potpunosti je domaći, i oni su podvrgnuti domaćem zakonodavstvu i nadležnosti domaćih organa, dok preostali imaju neku vezu s inostranstvom, drugim riječima imaju strane elemente ili međunarodna obilježja, pa podliježu pravilima međunarodnog privatnog prava

Prema tome, prevashodna pretenzija u ovom radu je da sagledamo opštu problematiku nasljeđivanja sa inostranim elementom, osnovne koncepcije u određivanju mjerodavnog nasljednog prava, zakonsko i testamentalno nasljeđivanje i regulisanje nasljednopravnih odnosa sa elementom inostranosti u pravu Evropske unije sa osvrtom na evropsku potvrdu o nasljeđivanju.